

Konfirmationsgottesdienst vom 12. und 19. März

«Lebensreise» – Lk 5,17-26

Liebi Gmeind,

Wer vo ihne chan säge, dass er oder sie scho mol d'Reis vom Läbe gmacht het?
Also en Reis, wo's in sich het. En unvergässlechi. En Reis, wo Chraft giht, au wenn
sie scho lang verbii isch.

Viellicht isch es Weltreis gsi – es Gfuehl vo de Unabhängigkeit, de Wiiti und em
masslose Abtauche in Raum und Ziit.

Viellicht sind's aber au eifach d'Maledive oder sosch irgend en wonderschöni
Strandlandschaft gsi – mit em kristallkare Wasser. De wiise Stränd und de Palme,
wo zumne erfrischende Drink unter ihrem Schatte einlade.

Oder viellicht het sie ihri Reis vom Läbe eifach an Vierwaldstättersee gfuehrt. Dete
wo s'türkisfarbene Wasser uf die schroffi Bergwält trifft. Wo urchigi Tön d'Täler er-
schütttere und d'Glocke vo de Küeh en heimatliche Klang in d'Seel ie zauberet.

Wohi het sii ihri Reis vom Läbe gfuehrt? Dete hii oder nöimed andersch. As Ändi vo
de Wält oder ganz nöch vom Gwohnthe?

So – oder so. En Reis bewegt, verzauberet – und loht alles imne andere Liecht er-
schiine. Es isch de Zauber vom hoffnigsvolle Neue. Alles isch möglich a däm unbe-
kannte Ort, alles chan no bewegt werde in mine Gedanke – nüt het sich festfahre
– isch Alltagsroutine – erstarrt in Sorge und Ängst. Mer nimmt wohr und macht Er-
fahrlige, wo's Läbe präged. Und mer wird zunere Andere. Bewegt – vo de Eindrück,

wo sich tüüf is Bewusstsii eingrabe und de eigete Läbensreis, wo mir alli unterwäge sind – en nöiie «Drive» verleihed.

Um's churz z'mache: So en Reis veränderet. Erst Rächt denne, wenn's sich um die eigeti Läbensreis handlet. För die Reis bruuchts nämli guets Gepäck: De Muet zum Aufbruch und de Muet ned alles wösse z'müesse, sondern au glaube und vertraue z'dörfe. En Glaube an das, wo öisi eigete Möglichkeite überstiigt und en Hoffnig, wo öis is Neue emporhebt.

Um Muet, d'Hoffnig uf en Neuanfang und en Chraft, wo us emne glähmte Läbe es bewegts macht – gohts au in de hötige Gschicht.

Es goht um's Läbe vom glähmte Maa, wo de Lukas devo verzellt. Er wird nämli bewegt – ned dur sini eigeti Chraft – sondern vielmeh dur de Glaube vo de Andere. Aber fömer ganz vo vor a: Es isch en typische Tag in Israel. Jesus lehrt. Wiedermol. Und wiedermol hets Lüt um ihn ume, wo ihm zueloset. Und wiedermol sind d'Pharisäer und d'Lehrer vom Gsetz ned wiit ewäg – die sogenannti religiösi Elite. Die, wo genau gwösst händ, was richtig und falsch isch. Die, wo vom Sichtbare ufs Unsichtbare gschlosse und mönschlichs Läbe schubladisierd und abgfertiget händ. Das isch im Übrige näbe de andere Einschränkige, wo die Gschicht behandlet, eini vo de schlimmste Behinderige uf däre Reis durs Läbe. Wer ned wahrnimmt, aber meint z'ggeh und's de au no wertet, wird mit sim Urteil zum Tod uf zwöi Bei. Mit däne Kategorisierge wird nämli d'Grundlage gschaffe, um «Nei» zu däm z'säge, wo ned in d'Schublade passt. «Nei» zu däm Mönsch, wo de Vorstellig ned entspricht. Es «Nei» zum Läbe sälber. Das isch sozsäge de Lifestyle vo de Pharisäer gsi – uf jede Fall nach em Lukas – dorom isch für d'Pharisäer en Krankheit oder en Behinderig automatisch mit Schuld in Verbindig brocht worde («irgendöppis muess er jo gmacht ha, dass Gott ihm zwöi kranki Bei geh het»), - öppe eso het das

Denkmuster funktioniert. Entsprechend het de Maa mit de glähmte Bei sicher ned die grossi Zuestimmig vo dänne ehrewerte Manne gfonde.

Jo – die Pharisäer chömed in de biblische Gschichte ned so guet ewäg – mer chönnti säge, dass ihre altklugi Charme en lähmende Esprit versprüht. Aber Jesus het sich vo däm ned wiiter beeindrucke loh – er het gheilt was s'Züüg ghalte het. Es Wunder dete – es Wonder do.

Und d'Mönsche sind zu ihm hiigströmt, wie d'Müggli zum Liecht – um dä z'gseh, wo mönschlichs Läbe wieder ganz macht und Zerbrochnigs heilt.

Leider het das in däre Gschicht nur für die golte, wo in Bewegig gsii sind. De Glähmti het nämli kein Zuegang zu däm Jesus gha. Er lieht uf em Bode vo de Tat-sache.

Und eso vegetiert er unsichtbar am Wägrand vor sich hii. Vo niemerdem bemerkt.

Usserd: Sini vier Fründe. Mönsche, wo ihn in Bewegig bhaltet und an ihn und sis Läbe glaubet. Die vier händ nämli en Plan. Sie händ de glähmti Maa uf d'Reis vo sim Läbe gnoh. Nei – ned zu de Maledive, au ned um d'Wält oder an Vierwaldstät-tersee. Sie händ ihn uf ihri Schultere gnoh.

Und sind ned das die wertvollste Reise im Läbe? Wenn mer sich uf de Schultere vo de andere usruihе dörf – währenddem sie öis in Bewegig bhalte?

Glaube in däre Gschicht heisst also «öpper uf de Schultere zträge». Das sind kein schwärmerischi Träum – nei – das isch s'handfeste Vertraue dodruf, dass uf öisere Reis durs Läbe no anderi Chräft am Wörke sind, als nur die eigete. Dass es no an-deri giht, wo eim begleitet und träged.

Die vier händ ihre 5ti im Bund also treit. En Form vo Glaubensverbundeheit, wo uf das hofft, wo ned isch, aber no chan werde.

Eso isch die eher chli spezielli Wandertruppe unterwägs. 4ert reit, oder fühlt sich treit und ein Schritt nach em andere führt sie nächer zu däm Jesus. Dä Gottessohn mit ere Chraft, wo öisi Möglichkeite bi wiitem überstiigt.

Aber dä Zuegang zu däm Jesus het dMängi verschlosse. De Masseandrang isch so gross gsi, dass es keis Durecho geh het. Dorom händ die vier ihre Kolleg churzerhand uf das Dach vo däm Haus ue treit. Sie händ s'Dach abdeckt und de bettlägerigi Maa am Seili abegloh direkt zu de Füess Jesu. Und mir merked: Biblisch ggeh, chan en Dachschade au en riesigi Chance sii.

Do lieht er jetzt also – im Fokus vo allne. Er, wo eigentlich an Wägrand hii ghört. Dete, wo ihn niemerd gseht. Aber jetzt lieht er do. Für alli sichtbar. D'Mängi vo de neugierige Blick uf sim Körper. Sinere Schwachstell – sim Manko.

Und Jesus? Er gseht und redt. Ggeh het er de praktischi Glaube vo däne vier. Gredt het er zu däm Maa am Bode: «Mönsch, dini Sünde sind dir vergeh». Was für öis provokant – isch zugliich au schön. Dä Maa am Bode wird ned über sini Behinderig definiert, sondern als Mönsch vor Gott angsproche. Eine, wo im göttliche Blick durchaus sichtbar worde isch. Aber ned als Manko. Jesus reduziert öise Akteur nämli ned uf sini Äusserlichkeite, sondern gseht ihn als Mönsch.

Mönsche sind au mir. Und au mir befindet öis im Sichtfeld vo Jesus. Au dänne, wenn mir s'Gfuehl händ niemerd andersch gseht öis. «Dir sind dini Sünde vergeh» giltet dorom au höt no. Und ich glaube, mir alli händ scho Erfahrigie mit öisem weniger charmante «Ich» gmacht. Oder wie händ sie's? No nie schubladisiert? No nie

mit Aussage verletzend denäbe gläge? No nie is Fettnäpfli trampet? So stolpere und stürchle doch au mir uf öisere Läbensreis hüufig über öis sälber: Öisi Meinige, Überzügige, Gwohnheite, Selbstverständlichkeit. Sie möged Orientierig geh, aber sie enged au ii: In öisne Denkmuster, in öisne Vorurteil. Oder andersch ausdrückt: In öisem altkluge Charme mit lähmendem Esprit.

Glücklicherwiis loht sich Jesus – wie scho zu Pharisäer-Ziite – au höt noni vo somne Verhalte beeindrucke. Er konzentriert sich ned uf d'Engi in öisem Härze und reduziert öis ned uf das, wo d'Läbensreis behinderet – vielmeh wändet er sich de Vergebig zue, dä Part, wo us em Stillstand holt und öisere Reis de nötig «Drive» verleiht.

Und de Drive zeigt sich in däre Gschicht inere heilsame Verunsicherig:

- Einisch in de Chöpf vo de Pharisäer – dete wird nämli öppis angstosse – mit wellem Resultat – wösse mer ned – aber immerhin händ sie sich ernsthaft Gedanke über ihres Gottesbild müesse mache.
- Einisch bi de Mängi: Sie händ nöii Sache gseh, wo ihne komisch vorcho sind – sie aber au zum Gotteslob animiert het.
- Und einisch in Bezug uf de Glähmte: Jesus spricht ihm nämli en nöii Bewegigsraum zue. «Stand uf und gang». Sis Schicksal isch nöme das am Bode – sondern das uf zwöi Bei.

Dodemit wird «Stand uf» zur Vergebig in däre Gschicht. Sie wird zur Hoffnig für d'Seel. D'Hoffnig uf en Gott, wo öis gseht und anspricht. D'Hoffnig uf en Gott, wo öis ned uf das festleicht, wo gsi isch, sondern wo no dörf werde. En Chraft, wo treit und zu Mitträgende chan mache.

In däm Sinn schafft Jesus mit de Vergebig en ganzheitliche Raum, dass öppis neus in Bewegig dörf cho. Au höt no. Do debii gohts ned um's Vergässe, was passiert

isch, aber um's Vertraue, dass heil dörf werde, was verletzt worde isch. Vergebig leiht sich ned uf's Manko vo öis und de andere fest.

Und ganz ehrlich: Ich finde das erliechternd. Es bedüütet nämli, dass mer ned als Perfekti dur d'Wält müend goh, sondern als Mönsche – als das, wo Gott öis scho immer gseh het und öis immer gseh wird. En Erliechterig au dorom, well mer ned immer muess, wösse – sondern au dörf Glaube und Hoffe uf das, wo noni isch, aber no chan werde. En Erliechterig, wo sich im Übrige durchaus au bi de andere dörf bemerkbar mache – indem mir ihne de gliich Raum vom Neue zuespräche, wie er öis vo Gott zerst zuegsproche worde isch.

Vergebig strebt also ned nach Macht, sondern nach em bewegte Mitenand. Und do devo chan en Läbensreis nie gnueg becho.

Ich wönsche euch dorom de Glaube a de Gott vo de Vergebig. En Chraft, wo öis und de andere Bei macht. Uf dass ihr immer wieder Glaube und neu Vertraue dörfed, - au uf d'Mönsche, wo öich verletze. Es Vertraue zum Trotz sozsäge. En Energie, wo vo Herze chonnt. In däm Sinn: Bon voyage!

AMEN.